

四庫全書

集部

欽定四庫全書

滋溪文稿卷十八

元 蘇天爵 撰

碑誌

故曹州定陶縣尹趙君墓碣銘

泰定四年八月乙未承直郎曹州定陶縣尹兼諸軍鄂
囉勸農事趙君年五十四以官卒其年十月庚申葬中
山安善縣堯坊原又三年其子藝來京師疏君行事徵

文以表其墓藝與天爵嘗同門學相友善爲序而銘焉
序曰君諱時勉字致堂世家蔚州蜚狐曾大父璿國初
倡鄉民來歸累官提刑按察侯贈儀同三司太保上柱
國定國襄穆公因官中山徙家焉大父秉溫左右世祖
四十餘年管兩都作朝儀制歷象悉與其議卒官昭文
館大學士知太史院侍儀事贈金紫光祿大夫大司徒定
國文昭公父睿生具美質而不克壽以君故贈承直郎
真定路總管府判官君幼聰警絕人及長事師故國子

司業滕公安上滕公門人多文雅端謹之士君以貴游
子及其門磨礱浸灌之久問學粹精治身修潔而無驕
矜浮靡之習其事長以恭接友以信齋居終日晏如也
君初後承直卒五月而生母氏尋亦卒鞠於伯母冀氏
及冀氏卒服喪三年以報其德文昭公既薨諸父多官
於外君始經紀其家御下肅然趙氏族大而盛歲時伏
臘昏喪君承之皆有法嘗悼近世之士貴爲公卿而享
祀其祖禮同庶人乃稽司馬氏朱氏祭儀家禮爲祠堂

於正寢之側凡喪祭昏冠議而行之鄉郡聞家或從而
化建學家塾延師以訓其宗族子弟之無依者里人亦
多采學焉名既著朝廷者舊聞而薦之起爲承事郎侍
儀通事舍人供職未幾會有佞幸除爲侍儀官者君曰
是豈可與共事耶即移病去先世別墅在郡城東新河
之陽君益修治爲堂爲亭爲臺爲池清泉奇石嘉禾脩
竹映帶左右君偕好友日鳴琴觴酒婆娑詠歌以自娛
翛然若與世相忘者久之起爲承務郎右闕作司同提

舉君曰吾學儒者也豈能吝出納以爲有司之事乎又移病去居數年出尹定陶是邑土沃而民庶君下車既驗民力差爲九等悉著於籍凡賦役調發按籍而行於是姦吏不得暴斂侵其民矣先是俗頗健訟富室子弟或珥筆習吏覬免徭役君興學宮禮師儒悉使就學執弟子業躬爲訓督日漸月化而習俗亦或少變焉民有親死欲火之者君以理諭之而止無何政清訟簡流戶來歸惟恐君滿代而去其卒也咸悲惜之君曾祖妣楊

氏祖妣張氏俱追封定國夫人妣劉氏贈恭人配李氏
封恭人陝西都轉運鹽使汝明之女子男藝由國學弟
子員補侍儀舍人調靖海尉女適同知安肅州事崔繼
宗孫男勝寧銘曰

維志之勵克善其繼維學之修克篤於誼彼皆赫赫我
則舒舒玉佩長裾進退裕如壽考孔延施不盡有尚復
其初以燾爾後

右衛親軍千戶鄭君墓碑

國家初以干戈平定中國一時豪俊風起雲蒸戰伐攻
取勲列焜耀厥後父死子繼兄終弟及所以修習武備
褒表功德而勛舊世家以爵祿相讓光顯於時若鄭君
者蓋可稱列者也君諱銓字方平真定靈壽人元帥府
經歷贈資善大夫大司農卿常山郡公諡安僖諱守德
之孫資善大夫江浙行中書省左丞贈推忠宣力功臣
榮祿大夫平章政事趙國公諡武毅諱溫之子至元二
十六年代其兄爲右衛親軍千戶大德七年復以其官

讓其兄子克謏元統元年閏三月二十三日卒其年四月八日葬君生貴家而無執紼之習兄弟四人長曰利用監承欽次曰樞密院判官鈺季曰同知靖州路總管府事鏞君次居三初武毅公行省江南欽鈺列官中外君與鏞留養母滎陽郡夫人馮氏會召武毅公入覲世祖皇帝方畋柳林君從見於行宮上偉其容乃命宿衛成廟未幾侍成廟撫軍龍荒錫賚優渥及嗣兄官當天

下攝然武無所事君亦未嘗苟於其職朝廷既建太室

歲常以十月剛日大享先期百官執事者賜湯沐錢而
吏卒亦均賚焉有司或不時給君上言祀者著誠致潔
也今湯沐錢或不均賜非是自茲有司奉行唯謹又嘗
分董治橋於渾河以備乘輿秋獵既而霖雨水溢君所
治橋獨堅完不壞乘輿安渡勅賜酒饌及讓官家居作
園亭於衛水之上疏泉種樹逍遙杖屨日與里翁鄰友
投壺觴酒以自娛陶然忘其爲貴家也君性孝友武毅
公薨時葬其鄉東北原封樹石儀既嚴且固先世邱墓

在其原者君復修治垣墉鏤石表之俾子孫不忘其處
有姊孀居迎養於家親朋貧屢不能家者多賙給之君
凡五娶王氏董氏岳氏蒙古氏孔氏子男克順今尉趙
之臨城女五適趙憲李志順康中正皆官族子二幼在
室君卒時年七十二從葬武毅公兆次銘曰

鄭爲顯姓在唐尤盛相業輝華覃恩餘慶於皇天朝神
武開國猗武毅公應時豪傑奮厥才勇南土是戡活人
止殺篤生多男君世其官遭時清寧林蘊莫施孰究其

成凡代將家傳及苗裔或起爭奪以隕厥世偉哉鄭君
獨典禮讓刻詩墓門永光穹壤

故承務郎杞縣尹閻侯墓碑

真定郡城西北三里有墓林焉余嘗過而問之其故老
曰縣尹閻氏之先墓也及余使憲淮東而縣尹諸孫師
魯適掾憲府廉慎而文余獨愛之間而請曰師魯之先
大夫仕至元間最後爲杞縣尹有惠政終更民愛思之
不忍其去逮卒又留葬焉今三十餘年矣吾先世皆葬

真定不可使吾祖魂遊他州將以某年月日載其柩歸公以鄉曲之故幸賜之銘則吾祖行治庶其不泯沒矣余聞其言而感焉比見中州士夫宦遊於南方者往往樂其風土之美而無邱隴霜露之思今閻氏獨知歸葬先墓宜有銘以示於世按閻侯諱琛字伯玉初從真定府辟爲椽曹歷檢法官及稅務使至元二年遷轉法行又陞真定路總管府知事四年加將仕郎開元路宣撫司主事九年轉益都路總管府經歷十三年遷承事郎

召磁路鐵冶同提舉佩銀符十九年除趙州寧晉縣尹
橐城歷尹及杞元貞初以年老不復仕我國家初定中
原故丞相史忠武王開府真定登用前金遺老陳立法
制撫摩瘡痍政化流行民黎安輯久之治最河朔諸郡
流風善政一時賴之侯之少也猶及接見前輩律令章
程皆習知其說爲椽曹檢法不以文深爲害人已德之
在幕府贊畫咸適其宜佐鐵官課最而人不擾歷尹三
縣皆以惠養元元爲本當是時爲上官者亦多老成勛

舊故其下言信而事易集寧晉早歉侯請於大府得米以賑飢民又推其餘惠及鄉邑杞學傾圮侯創禮殿建黌舍延師俾講經訓暇則率僚吏往聽焉學者由是興起縣當驛置之衝侯剴繁治劇益有餘力時朝廷未有致仕之令侯雖年老精力尚強乃曰人可以不知止乎即退休不仕將歸其鄉杞人挽留侯因築室以佚老焉嘗曰吾生平有二幸其一自少至老未嘗有疾不知藥石刺治之苦其二入官四十餘年夙夜祇畏未嘗被上

官呵譴今已謝事又沐國家承平之澤正當觴酒樂歌
優游以盡餘年疾革起正衣冠端台坐悉召子孫前列
申以誨言各飲以酒已亦引滿就枕悠然而卒享年八
十大德三年十一月十一日也侯爲人明敏特達幼失
怙恃鞠於其兄及長友愛彌篤常恨少長兵間學不克
盡儒術乃勗子孫讀書皆以儒名侯之鄉友有夤緣柄
臣驟登宰執者欲相薦引侯陽爲遜辭陰實絕之其人
後坐事誅諸薦引者皆免而侯獨無所污人服其識侯

曾祖鑄祖浩考元金季爲林州元帥府經歷妣賈氏魯山令某之女侯昆第三人珪璋侯季也初配趙氏先卒繼室高氏金正奉大夫戶部尚書夔之女皇通議大夫河北河南道提刑按察使從道之女弟也夙有婦德克相夫子子男曰鼎將仕郎分寧縣丞謙潁州儒學正晉祥符縣務使男孫四人師道德安府務使次師魯師德師賢女孫五人侍儀舍人周騰磁州判官楊克昭博野縣主簿高某田玉張中式其壻也銘曰

昔在至元人材方興世紀其官允著賢能矧維閭侯三
仕爲令至今鄉民猶誦名姓古人有言狐死首邱何獨
於人魂遊他州杞雖桐鄉趙爲侯里永安其藏利及孫
子

大元贈奉訓大夫博興知州程府君墓碑銘

濟南章邱縣之嘉會鄉故贈奉訓大夫博興知州飛騎
尉歷城縣男程府君之墓在馬府君諱璧字君寶享年
若干以大德某年某月卒配蔣氏封歷城縣太君享年

百歲以元統某年某月卒子男五人曰義曰恭曰信曰肅曰某孫男四人曰益恭之子曰某信之子曰某曰某仁之子曾孫男三人曰矩曰圓曰桂皆益之子也程氏本冀州棗強人金季轉徙章邱世服田畝我國家治平百年民獲休養程氏族大以蕃而先兆族葬至不能序昭穆蔣夫人卒恭始卜得吉壤去先兆西南二里奉遷府君之柩合葬焉周以垣墉樹之松柏前列石儀翁仲將刻銘墓碑弗果而卒至正五年天爵使憲山東矩來

請銘念昔與益同朝相好屢聞恭官江南有聲及聞進士王健之狀始知程氏孝廉世有陰德故爲叙其事而銘焉按府君之考萬爲人慈祥不苛嘗爲濟南郡獄掾囚之飲食必躬視之夏則汎掃圜圉令無汙穢冬則織蒲爲屨分給其衆或獄卒榜掠罪人妄有誅求輒訶止之曰笞杖徒殺有國法存汝曹何敢法外加慘酷乎以故活者甚衆囚或有就刑者輒仰天呼曰程公撫我恩踰所生願公壽考多子孫我死固無憾矣妣孫氏治家

有法姻族訟者多就直之躬行節儉以率其下考妣皆以高年終府君其長子也早歲以才能著已而山東按察辟爲書吏操持清介人不敢干以私遇事敢言屢與官長爭曲直久之不能與時俯仰迺嘆曰吾母年在喜懼吾何爲違甘旨之養屈志以從事於斯乎嘗聞鄉長老言吾父有陰德於人程氏將有興起者矣即辭歸事母以孝聞於郡國諸子惟恭能官初爲淮西憲府譯掾教授嚴州掾辟江浙行省擢漂水州判官轉吉水州以

守令選尹句容再遷南陵語家人曰吾養親之日能幾
何時與其疲精神以事上官曷若盡孝敬以奉吾母即
日棄官歸踰二十寒暑不離左右母老遂謝事進官奉
訓大夫同知松江府事其在吉水潔己以愛民勤政而
善俗既去二十餘年民思弗忘建祠刻頌以著遺愛在
句容課民樹桑四十萬興學聘士以化其民尤善教子
常誨益曰吾世清白無以遺汝汝能勤學足矣益既登
進士第則訓之曰富貴有命汝惟進學是吾所望及聞

益入翰林爲檢閱編修官改秘書郎國子博士奉詔與
修宋史則竊喜曰吾子問學庶有進乎益擢監察御史
未幾以論事切直出遷河西隴右道肅政廉訪使事亦
卒君子惜之銘曰

樂水之東維齊之疆芄芄者麻菀彼柔桑自昔有年民
庶豐足耕焉學焉尚知榮辱猗與府君試吏明時克峻
所恃不詭以隨釋爾筐篋奉爾甘旨士稱廉平鄉推孝
弟念昔厥考慈祥不苛治獄活人陰德孔多清白再傳

益大以侈遺愛在民如古循吏侃侃御史學蘊其躬直言不阿卓有祖風守官以廉趨庭以孝子繼孫承是則是效嘉會之鄉鬱鬱新阡表其孝廉過者式焉

故承事郎象山縣尹李侯墓碑

士有負不羈之才奮有爲之勇弗克盡所施設齋志以沒君子惜之余讀象山縣尹李侯行事深有所慨嘆焉侯諱天祐字吉甫少有大志倂儻多智畧涉獵書傳遇古人偉節奇計輒慕好之既長欲以功名自顯南北既

一侯方踰冠蹶然曰今海宇會同聖朝臨御可以出而仕矣吾寧久遯荒野歟即走江漢之上以策干水軍招討司時中外官多名公卿招討使聞侯謀畫可聽推擇爲椽荆湖行省知其才命提領本司按牘尋陞知事嶺海初定朝廷新令未洽有盜竊發侯從招討使平之進擢湖廣行省椽交趾自中統初朝廷遣使諭之彼遂來貢其後負嶮不朝至元二十四年又詔湖廣省臣將兵征之侯掌文書從行是冬兵會廉州泛舟於海次安邦

與交人遇斬首二千餘級獲船六十餘艘追世子至弘
縣海口斬首三百餘級獲船二十餘艘明年春兵次塔
山洋與世子戰敗之又戰竹洞斬首二十餘級獲船九
艘轉戰連日數破其衆三月次白藤港交人橫戰艦江
中以拒我師值潮退舟不能進兵潰侯等被執乃斷其
髮或絕其食凌辱困苦萬方侯執守益堅不少懾屈久
之防禁少弛侯脫身拔歸晝伏夜行掘草木實食之數
日始達吾境行省以其事聞時朝廷初改鈔法重其職

守以候提領紹興路平準庫階將仕郎凡再考代者始至元貞初調衢州錄事民訟於庭立決遣之滿考赴調入京候以向陷交趾備極艱苦至是吏部止積月日與從七品先時行省郎官有以從征升一官者椽之同被陷者亦受從七品官獨候循序而進衆爲之不平乃自陳於政府於是即與正七品階承事郎慶元路象山縣尹兼勸農事邑有毫民二十輩表號龍虎張其聲威虐民蠹政候得其姦捕寘於法邑在郡治東南海島中去

郡稍遠有盜數十時出剽掠復乘舟入海官兵無可柰
何候選邏卒驍勇者親載入海悉擒捕之邑民始安又
差次邏卒勞效薦諸大府賜錢賞官而已不自爲功也
民有親喪久不葬者蓋始則泥陰陽休咎之說土俗困
而不改侯以禮勸諭期七日不葬者罪之或貧不克舉
者分俸助之而死者皆得歸藏於土仕者或沒官所妻
子貧而不能存勸好義者周之嘗言勸農興學王政之
始朝廷屢降德音而郡縣視爲虛文夫我則不敢春秋

親行鄉社諭孝弟忠信察其勤惰而賞責之月朔率僚吏入學聽師生講說經訓使知禮義廉恥而習俗亦少變焉會有詔遣使巡行郡國問民所疾苦覈吏廉貪同列皆坐罪免獨侯廉明著聞民共薦之使者復以他州婚嫁田宅獄訟未決者屬侯治之在官二年以疾卒士民莫不嗟悼相謂自內附迄今邑令未有如侯之賢者也侯世家高唐州之高唐縣在金爲官族兵後譜亡不可考大父寶父清皆隱德不仕妣王氏侯卒以大德七

年九月朔旦享年五十有一葬德州清平縣李官莊侯
所卜也元配劉氏祔焉子男五人必誠昭信校尉松江
府判官益贈承務郎同知高唐州事次珍鼎晉女四人
適劉某元某張某劉某皆士族也孫男八人瑛曲阜林
廟學正擢禮部掾卒珩常州路犇牛鎮稅務副使璉浙
東海右道肅政廉訪司書吏璵卒琰中書掾遷承務郎
江浙行中書省左右司都事璉琿琿讀書未仕孫女六
人曾孫男五人女八人俱幼侯性孝友事母得其歡心

輕財好施先業在高唐者悉推與伯叔昆弟徙家清平
力穡種樹生產漸饒買田四百餘畝及調官江南復分
與諸族人侯喪歸葬蕭然一貧宗人拜哭請以田廬還
之其子不受曰父命也吾不敢違相讓既久乃取田十
餘畝聞者賢之益信侯之廉讓不獨行之於己又能化
其家焉銘曰

馬也泛駕士或跖弛不有異才疇克任使才難之嘆古
今所同作而興之用世之功侃侃李侯抱器負奇立志

之卓胡寧詭隨往佐戎幕謀畫是賴奮義來歸士氣增
氣賞弗讎勞不卑小官志欲有爲世方治安年踰五十
竟殞其身施不盡有燾及諸孫嶷嶷諸孫肄業文史周
旋臺閣華聞日起孝思祖烈式徵銘章表諸貞石來者
勿忘

元故承德郎真定路總管府判官趙公墓碑銘

蔚州飛狐趙氏由太保儀同三司上柱國定國襄穆公
顯我國家龍興之初襄穆以城來歸歷事累朝屢典名

郡惠澤被於其民故諸子多留居其地第五子承直郎知輝州事秉讓因襄穆嘗監真定家焉公諱寬字子栗襄穆公之孫輝州君之子也初以父澤擢饒陽尉再尉真定進主靈壽縣簿入朝爲武備守管勾調揚州海門縣尹不赴會有詔舉庶官才堪守令者以名聞部使者以公應詔起尹濟寧之鄆城歲餘以老辭歸享年若干復號至元之四年四月十有七日以疾卒是月二十七日葬真定縣栢堂原祖妣定國夫人楊氏妣真定縣君

周氏配涿郡盧氏翰林學士承旨摯之女封恭人子男
二人祖德祖昌女五人適董守惠史墉耿瓚史澤元某
俱名家子孫男五人安高邑縣務副堅全某某女三人
公早喪親卓然克自樹立雖生大家而無紈綺之習盧
公一代名流奇公之爲以女歸焉真定居燕南孔道使
者旁午公迎勞護送不失其節治盜有方而不竊發其
佐靈壽督秋稅均平無私民至於今稱之及官武備被
命出董諸匠而工不急弛鄆城戶夥事殷公撫以簡靜

久亦稱治引年於家日具琴酒徜徉娛樂公性慈祥睦
宗族以恩交朋友以讓施之於官民亦安其豈弟之政
焉盧恭人治家清儉教子嚴明公得內助爲多後公若
千年卒享年若干昔先子參政府君與公交遊雅厚天
爵復與公諸子嘗同師學故謹序其家世銘焉銘曰
趙居飛狐號聞族烈烈官勛自襄穆歷典名邦政多淑
孫子誥誥食世祿惟定啓封鬱喬木栢堂高原公所卜
石著銘詩名不沒公侯之裔終必復

從仕郎保定路慶都縣尹尚侯惠政碑銘

至正庚寅慶都耆老王國瑞麴成邵德儒士趙士元呂
嚴等屢狀令尹尚侯治行上燕南憲府復詣予請曰吾
邑自至元大德以來爲政有聲者數人既去民饒其遺
愛於碑老者雖亡少者猶克知之以有石章故也尚侯
家世卿相由成均釋褐入官即能大振名聲非賦予過
人能若是乎今則瓜代將刻石著其惠政執事幸賜之
銘庶吾民永遠而不忘也嗚呼比年朝廷悼雨暘之失

時憫民生之不足精擇牧守惠養黎元故郡邑得人有
若尚侯者焉是宜紀具治迹以爲來者勸也侯以戊子
之秋下車時頗不熟米日踊貴侯即命發常平粟召四
鄉民減價糶之同列以爲難侯曰常平本虞荒歲今復
何疑賴以全活者衆侯勤於爲政朝出視事抵暮方歸
凡昏嫁田土獄訟積年不能已者悉決治之民皆以爲
平允縣以無事庭列羣吏講說經訓變其刀筆筐篋之
習鄉校所以正俗也舊皆以醫卜雜流爲之師侯擇士

之明經者施其教暇則親自飭厲民亦稍稍興於禮讓
焉農桑本以養民也世皆視爲具文侯躬行隴畝而敦
諭之又爲訓誡之詩家傳而人傳誦之四郊之桑皆鬱
然成列矣邑當燕趙之衝館傳在焉館中涖事者歲久
多方困苦其驛戶侯察其尤暴戾者黜之廳事頽壞者
新之什器不足者完之侯王大臣經行飲燕供帳之須
悉取於民侯規措有方民不知擾蓋驛館廩餼朝廷歲
給鈔有差使者日多或不足以供前至元中姚公天福

尹真定始自春初給鈔與民俾之規運而所須次第取之今則取之百倍鈔又不給郡縣皆然民不勝苦候視物賤時官自買之足給一歲之用仍有餘饒焉始者中原之人著戶版者或任征戍之勞或供館傳之役名曰軍站其爲民者夏則輸絲絹秋則輸米粟鄉推一人總其事若鄉官然比者年穀不登爲民者多貧乏流移乃命運軍站之家代總其事日伺於官官有所求悉以供之民畏其有破產之患爭納賄以求免而有司視爲奇

貨侯推次甲乙爲之事已治集者遣歸不令伺於官所
姦吏計無所施民心大悅當國者以經費不足歲課漸
增而鹽益貴民私煎者日益多漕司邏者查至守令畏
天覺察獲罪令民十家爲甲出錢賂之侯令既嚴民不
敢犯邏者亦不復至先是邑境盜竊屢發侯以民素無
教始因賭博飲酒游蕩無檢久則遂至爲盜陷於刑辟
官府初不知也其知之者鄉長鄰里乎惟杜其源則絕
其流民有犯此者鄉鄰之長即以名聞否則同坐以故

民皆相帥爲善無爲盜者凡郡縣令下揭之於牌本以示信也卓隸奉行會斂百端侯爲文符令鄉社自相傳達卓隸一至鄉社飲食若干需索若干悉書於籍月一具聞侯覆實之遂無一人無故輒入鄉社擾民者侯廉慎修潔每出行縣裏糧自隨吏亦化服民愛戴之己丑之夏天少雨民以旱告侯齋沐禱於西山雨隨霑足歲亦大穰蓋其爲政廉平名實相應是以民足衣食安於田里而無所撓嗚呼中國承平百年朝廷德澤深厚戴

白之老目不識兵民生當益富完柰何今者日愈趨於彫弊蓋本於守令之貪暴加以政令之繁苛民有愁嘆之心是以時有水旱之異返而正之其惟循良之吏乎詩曰豈弟君子民之父母其尚侯之謂矣非惟侯爲然也監縣完者帖木耳嘗以諸侯王命監衛輝郡捕盜有功中書改奏是官與侯同心愛民故邑以治聞侯名恕字彥仁世居保定銀青榮祿大夫平章政事齊國正獻公諸孫吏部侍郎克強之從子至治進士監察御史克

和之子夫以故家詩禮之漸濡成均師友之訓誨宜其爲政多可紀云銘曰

燕趙之衝邑曰慶都乘傳馳驅行者日瘠邑有大夫厥修自初迎候走趨遑知其餘民則嘆吁孰恤我飭有美尚侯肅肅冠裾廉平以居匪亟匪徐潤飭吏事悉本於儒起視鄉校汝敦詩書惟善與俱俗惡是祛出省農夫爾耕爾鋤吾無汝需田無荒蕪而弊者完而傾者扶凡令之敷惟簡以孚曰吏曰胥里絕追呼獄訟日無徭役

日除民力日舒式歌且娛頌聲載興乃勒乃模允著令
譽悠久弗渝

無極縣尹唐侯去思碑銘

大凡今仕於郡縣者率三歲乃代而守令之任則尤重
焉無極尹唐侯治縣七年代者始至士民耆老不忍其
去錄其政之善者屬其文諸石尚其永遠不能忘也夫
天下之事未有不至於久而能有成者也況於方千里
之郡百里之邑欲其民庶之家給農桑之業成風俗之

淳美治化之流行豈一朝一夕所可致歟昔子產爲鄭
一年而人歌之曰取我田疇而伍之取我衣冠而楮之
孰殺子產吾其與之三年而人又歌之曰我有子弟子
產教之我有田疇子產殖之子產而死誰其嗣之使子
產爲鄭一年而去則政教未孚孰云其有遺愛乎漢孝
宣嘗曰庶民所以安其田里而忘嘆息愁恨之心者政
平訟理也太守吏民之本數變易則下不安民知其將
久不可欺罔迺服從其教化而黃霸亦曰數易長吏送

故迎新及姦吏緣絕簿書盜財物公私費耗皆出於民
嗚呼守令之不得久居官守民庶之不得洽其政治豈
非古今之所患乎然則唐侯之尹無極宜其政之有成
而可書也侯初下車令不輕出令出而民不違事不妄
作事作而民斯應謂民非耕桑何以能養故巡行壠畝
親勸督之而農無怠惰者謂民非教習無由自立故興
崇庠序數教誨之而士有成立者比年水旱不節稼穡
不登民無宿儲而征戍乘傳之勞未嘗缺供故民日益

貧困侯知其然凡大府文書之至稍有不便輒力陳之
惟恐其病民也郡縣歲以土之所出民之所有具其時
真達於省部侯其所需而應之然而直不時給民甚苦
之侯救其數以聞庶少紓其力焉朝廷常募民入菽以
實河倉檄至侯言無極邑小民貧菽無有也中山命糴
常平倉粟侯言連歲凶荒民方乏食請止其糴侯始泣
事民訟立辯曲直既而民無所訴旁邑民訟或歲久不
能決者郡符屬侯治之皆伏其平真定當滹沱之衝夏

秋水爲城患春則豫修隄防蒨葦之費畚鍤之勞均於其屬而中山所領縣三安喜當其十之六無極新樂當其四後以新樂驛傳所置得免無極獨當其四近歲安喜請於會府又免其三無極遂當十之七侯奮然曰同爲民也爲上者當均其役豈宜利彼而病此乎是彼能愛民而我不能也乃列狀數百言陳於會府遂仍其舊斯則侯之永久有利於民者也嗚呼今之爲邑者苟且一時之政孰思其爲後日計乎而侯之深謀長慮如此

民其忍忘之哉侯常建常平倉繕完三皇及孔子廟下
至澤梁塗路亦修治有法蓋於興利去害皆勇爲之夫
以朝廷宣布號令更張治化無非所以爲民然而貪墨
之徒舞文玩法適則爲害不有慈祥豈弟之君子何以
能稱國家責任之意副黎元望治之心乎今唐侯在官
七年治無煩苛民有遺愛故予列序古人久於其職而
政有成者告之庶幾有官者有徵焉侯名鎔字子治益
都費縣人由資政掾尹是邑階官承事郎銘曰

皇有中原治安百年德澤涵濡雨露自天水旱蝗螟比
歲爲害稼穡不登民生奚賴豈弟君子務休民力民力
既息衣食滋殖猗與唐侯廉平不苛爲政七年民樂且
歌長吏數更勞於迎送維昔君子久則化成懷樂苟安
玩歲愒日雖服官政朝不謀夕猗與唐侯慎始克終爰
述頌詩播美無窮



滋溪文稿卷十八

欽定四庫全書

集部

滋溪文稿卷二十九

詳校官庶吉士臣陳若霖

中書臣劉源溥覆勘

總校官進士臣楊懋珩

校對官中書臣葉蘭

謄錄舉人臣馬衍宗

欽定四庫全書

滋溪文稿卷十九

元 蘇天爵 撰

碑誌

有元旌表孝行劉君墓碣銘

君諱成字瑞卿姓劉氏國初由汴徙家燕君年二十喪其父事其祖母克盡孝養祖母卒奉其母氏益恭於是孝行聞京師故翰林承旨劉公賡以重德雅望久

在朝著搢紳推服適與君同里閑熟君之行登名於朝
朝議是之禮部符下表其門曰孝行云延祐五年正月
也是時天子方以孝治天下而劉公年已七十爲國耆
老其父孝靖公年九十餘天子重其高年數遣使即其
家賜以幣帛酒醴一時敬老興化之意誠太平之盛典
也故劉公一言而君遂承旌命海內聞之有不興起者
歟禮曰司徒養耆老以致孝詎不信夫君爲人溫厚慈
祥治生以奉旨甘寒暑晨昏不懈也居喪如禮買地爲

塋域以葬其親及宗族之未葬者撫其弟慶友愛尤篤同居共庖不間於人言治家節約資用有餘輒施與其親族朋友之貧者人由是益稱君賢蓋不獨孝友於其家又能推所有以及於人也君享年六十有一以至治元年正月二十三日卒葬大興縣燕臺鄉海王莊其孤子屬太史保章氏齊克明狀君行來請銘余於君未之前識也向在詞林嘗侍承旨劉公而保章則同門友也因不固辭而爲之書君祖信妣韓氏父德祿妣蘇氏娶

張氏子男一人敬祖讀書不仕嗚呼自昔京師俗稱浩穰強宗富室多輕俠橫恣甚則武斷以亂吏治而劉君獨能以孝行旌其宅里茲其可銘也夫銘曰

翼翼神京風化攸興自遠伊邇罔或不承溫溫劉君允修子職不耀其章好是懿德彼都人士冠蓋如雲篤其天倫孰無父舅念茲孝友尚其作則表銘君阡車過者式

元故尚醫竇君墓銘

方技之學古人所慎重也故醫非三世不服其藥聖人著之禮經以示後世蓋傳業貴欲其精用物貴欲其熟豈漫焉嘗試者乎真定竇氏以醫術著名百餘年矣至君而名益顯君諱行冲和卿其字也世祖皇帝在位既久一時才俊悉被任用聞郡國有名能藝術者亦遣使徵之親詢其人以察其所學而其人非真有所能則亦不敢應也當是時光祿大夫許公國楨領尚醫事以君名聞即日被徵既至入見便殿賜對承旨命爲尚醫京

師之人無貧富貴賤請之輒往遇疾輒已人德報之則曰天實生之未必盡出吾術也會皇孫梁王開國雲南詔選尚醫從行近臣以君應詔賜以衣裘鞍馬君先時名籍隸樞府至是改隸尚醫又錫璽書護其家俾永蠲其徭役焉雲南去京師西南萬里風土氣候與中國殊王既居之而無苦蓋君調護之力居多久之君以親老求還其鄉王不忍違厚其禮而歸之君居鄉里學醫者多師其說疾之尤難起者須君爲之君察其表裏虛實

寒熱用所宜藥莫不奇中立効蓋君少嘗講授詩書孔
孟之說故於醫經方書獨得其大原大本非若世人取
効一方一法而無所通也君年既高遂厭世事買地郡
城之東闢爲小圃築亭於中周植嘉樹偕其好友婆婆
嬉遊怡然忘其年之老也集賢學士盧公摯時方貳憲
燕南表其亭曰靜深中朝碩士咸咏歌焉君以至大二
年六月十七日卒享年七十有七葬真定縣新市鄉三
家里西原考大栗母某氏娶高氏繼左氏子男四人曰

仁曰榮曰禮曰智女二人適平原縣尹張惟哲聊城縣主簿張明孫男五人君既以醫顯名諸子皆世其業榮最知名初用薦者補御藥院掌藥累遷廣平路官醫提舉既葬君之二十有五年榮偕國子監典簿郭質求銘其墓天爵昔者嘗讀覃懷許文正公遺書有曰近世論醫有主河間劉氏者有主易州張氏者張氏用藥依準四時陰陽而增損之正內經四氣調神之義醫不知此妄行也劉氏用藥務在推陳致新不使少有拂鬱正造

化新新不停之義醫不知此無術也然主張氏者或未盡其妙則瞑眩之劑終莫敢投失幾後時而不救者多矣主劉氏者或未悉其蘊則劫劫目前陰損正氣遺福於後日者亦多矣能用二家之長而無所弊其庶幾乎按劉氏諱守真精通素問有名金大定明昌間既死其學無傳張氏諱元素博極經方然自漢以下惟以張機王叔和孫思邈錢乙爲得其傳遂以其學授李杲明之明之授羅天益謙甫明之國初有盛名嘗著傷寒會要

諸書行於世謙甫亦著內經類編兩人者皆家真定君蓋及見謙甫盡得明之之書讀之而有發焉故其醫業過人如此嗚呼天下之事未有無所師承而能名世者也豈惟醫哉銘曰

維古方技民生係也上焉十全下者泥也不有哲師業孰繼也爲方者宗播利惠也君讀其書善藥劑也疾者神之若龜契也名聞天庭光顯喇也歸休雍容進者礪也相彼函工慎厥藝也矧醫活人澤後裔也勒銘貞珉

永無替也

元故河間路醫學教授王府君墓表

至元六年予自維揚被召入朝道出河間以疾止命醫視疾得王彥澤氏問詢其家世之自彥澤言曰吾王氏家河間數世矣皆以醫業相傳至先考教授府君而名益著疾者請之輒往貧則惠之以米遠近求藥者踵門賴生全者衆府君爲人慈祥而孝友尤善事親晨夕躬奉甘旨以致其養平生樂趣人之急宗族飢寒者歲時

濟之不厭子弟孤幼者皆教養之居鄉黨事長者盡其禮撫幼者中乎節每儒服持謁必館於家苟有所求亦周給之故鄉社之人愛而敬之既歿而猶思焉嘗訓彥澤等曰比見世人以治疾取財居藥致富鮮克能久汝曹當以爲戒郡守廉知行義欲表於朝府君辭曰吾盡吾心而已豈干譽以爲是耶彥澤又曰昔金大定間鄉郡有良醫劉氏完素能起危疾名傾朝野累名不起賜號高尚先生兵後子孫皆亡而所著書幸在先世嘗因

劉氏遺書以治其術府君曰不可使劉氏之學無所傳也即其故居作新祠宇旦望率醫者謁之庶幾瞻拜儀形講習論著益廣其傳以活斯人焉府君之沒今十餘年得公一言以表於墓則其行義庶不泯沒矣予嘉彥澤之志謹論次之按府君諱宗字伯川初爲保定路醫學正遷衢州路教授再擢河間路教授享年六十有一以天歷元年三月十三日卒葬郡城西南三里祖諱珍妣某氏考諱璧前至元中授河間路管醫都管勾妣某氏

生子曰仁河南道按察司書吏曰誠滄州官醫提領次府君也娶某氏子男三人長彥澤由中山府醫學正遷晉州教授次彥直彥修孫男四人丕度丕進丕遠丕輔府君之叔父諱鼎生子曰弼曰讓曰義誠之子彥叔弼之子彥洪彥忠義之子彥濟彥深諸孫丕衍丕承丕顯丕明丕俊嗚呼聖賢之道大矣其散爲百家九流亦有可觀者焉嘗考夫劉氏之言曰醫教嘗本乎五運六氣世之醫者由未知陰陽變化之道失其意者多矣乃著

運氣要旨以明其經藥證宣明論以證其方玄機病原
式以辯其誤大抵皆祖素問而爲言也其用功精深造
術淵奧而王氏祖父子孫居同里閑討論遺書風聲習
尚蓋有默契者焉故其尊崇景仰若此然則縫掖之徒
於吾聖人之教當何如也是歲龍集庚辰春二月戊子
嘉議大夫江北淮東道肅政廉訪使新除樞密院判官
蘇天爵述

李遵道墓誌銘

君諱士行字遵道姓李氏故集賢大學士薊文簡公之
子聰敏過人少從文簡公官吳越及見故國遺老而吳
興趙公孟頫漁陽鮮于公樞則又從學朝夕者也故其
歌詩字畫悉有前輩風致於時公卿大夫喜尚吏能不
樂儒士君年莊無所遇乃遊名山從釋氏學究竟大有
所悟久之娛意翰墨泛舟江湖見疎篁老木斷渚崩崖
輒推蓬艤棹臨觀游行心與境會愉愉然而樂其樂也
仁廟在御崇尚藝文近臣以君名薦遣使召之君以所

畫大明宮圖入見上嘉其能命中書與五品官偕集賢
侍讀商公琦同在近列文簡公歸老維揚特命君爲泗
州守侍行再調知黃巖州時郡久旱君禱於寒坑輒雨
歲用豐稔省檄錄囚閩州歲餘方歸適按部者至郡務
爲苛刻君不樂移疾去聞文皇潛藩在建業善接納文
士將往見焉行至上元縣界卒年四十七天歷元年六
月一日也葬江都縣某鄉某原君母王氏薊國夫人娶
王氏荆東僉憲某之女子男希閔温州永嘉尉女淑賢

金史卷之八
卷十九
適承務郎同知諸暨州事吉獲君卒之十三年希閔請
銘其墓我國家治平既久當有奇材異人出瑞斯世然
卒弗克振耀者可勝數哉君爲詩清遠蕭散畫品尤高
亦足以名世矣銘曰

矯矯李君志廣而材充既無所遇於世乃游戲翰墨以
寫其心胸欲超然於物外而志不與俗同蓋自古異才
奇士高世則難合絕俗則多窮故聞君之終世皆惋悵
而哀恫我述銘詩於以表君之幽宮

元故鄱陽程君墓誌銘

江東程氏皆祖忠壯公靈洗忠壯公仕南朝有功於歙
歙人祠之水旱疾疫禱焉故子孫蔓衍至今君諱傑字
世英其先由歙徙樂平故宋時有諱中行者官於鄱陽
因家邑之霍溪傳三世爲蘄州司法應淳登進士第有
聲君曾大父應炎司法之兄也大父萬里述論語大學
中庸說傳家塾父在以易中鄉貢進士選值宋亡不仕
君資篤實爲學精勤思不墜其父祖業年未壯時有司

欽定四庫全書

湖漢文稿
卷十九

十

以其家著版驛傳內附之初教令未洽吏旁緣爲姦其
家困苦弗能支轉徙江淮君既長奉親還鄉里身任戶
役而無所缺吏亦不敢橫有需求其親安焉久之先業
寢復宗族稱其材君事親孝暫出而歸亦必入謁親疾
躬奉藥餌疾愈乃已親沒哀毀骨立喪葬如禮母弟居
淮之樓陽歲疫與妻俱亡子無所依君教育於家不異
己子饒之名士若故進士吳君存令鑑書博士周君伯
琦望重一時君節衣食致禮幣命其子往受業焉且言

爲學當明經訓不當專尚文辭交朋友盡信義賓客過
門命觴具饌不計家有無人有急難竭力赴之鄉鄰鬪
者得君一言各解去不復詣有司嘗衝寒雨暮歸聞有
醉墮塗泥者即令從者界歸飲以湯藥達旦方甦泣謝
而去君生平行義類此晚樂鵠山密邇先墓有林泉之
勝築室居之表以悅山之號焉君生於前至元十四年
丁丑正月二十五日卒於仍改至元之五年己卯四月
二十九日享年六十有三葬先墓之側娶同邑李氏子

欽定四庫全書

湖溪文集
卷十九

十一

男二長與權大都路儒學錄次章饒州路醫學錄女二
長適吳政次適劉貞孫男二蘭生天次祖慶孫女二初
君命與權游京師因博士周君館於余家已而御史薦
其名春官擢其材奉中書省檄造雅樂禮器於江南而
遭君喪至正癸未予參湖廣省政與權挈舟千里來請
銘昔宋季年江東多文學節義之士若尚書湯公漢提
刑謝公枋得皆風裁凜凜可厲庸俗聞其風而興者寧
無人歟銘曰

維古尚行無易由言匪事枝葉貴有本原世教漸微風
習斯靡化俗達材始於君子大江之東英豪如雲卓哉
程君尚其知聞瞻彼鵠山原隰孔厚表其行義以厲爾
後

楊府君墓誌銘

君姓楊氏諱宗伯字禮卿故宋贈朝奉大夫渙之曾孫
迪功郎淮西制置司幹辦官友義之孫國朝白鹿洞書
院教諭師盤之子其先自華陰徙蜀朝奉之長子友直

由太學釋褐累遷知德慶府尉有華問學者號曰敝齋
先生樂東南廬阜山水奉親家焉故今爲南康路建昌
州人教諭六子君最居長方其幼時祖母李儒人極鍾
愛能言教之讀書凡先世遺訓皆使知之既就外傳進
退言動悉有矩度可觀鄉先生亟稱之成童即任幹蠱
衝冒寒暑奔走險難雖甚勞苦而未嘗幾微見於言色
當是時江南初內附我國家新令未洽官吏征斂並緣
爲姦民頗苦之君年尚少已能應門公私辦給皆具俾

父母安於所養而不知官府之擾考府君興教來歸不
樂進取卜新安里居之築室以障風雨墾田以藝禾稼
皆君心計指授居家孝友親有疾拜醫求藥必嘗而後
進親喪致哀葬祭求合於禮建塾延師以教諸子君恒
誨之曰吾楊氏本漢太尉遺胄父祖以清節著名吾兄
弟當夙夜績學以續詩書之澤諸弟賴君之教皆卓然
樹立族人或有喪弗克舉乃具棺以葬之子孫幼而孤
者男則教之學女則擇所歸焉近舍有澗溪之水君伐

木爲杠爲舟楫往來者不病涉也歲庚午江淮大旱君賣田買粟賑救其宗族次及鄰里故能不至於饑餓流亡蓋君天性好施非矯飾以干譽也廣東元帥府聞君行義檄授惠州合光寨巡徼官不果上君以新安之居湫隘遷隆造里構堂名曰積慶日從親舊觴詠娛樂其心休休然享年六十有八以至正元年二月十五日卒妻熊氏郡名士與文之女勤約以相夫子後君一年卒享年七十有一君母熊氏外祖天瑞宋名進士官靖安縣

丞子男玄貞女適謝謨丞相方叔四世孫君諸弟宗仁
宗德以高年深隱表號處士宗侃三傑以文藝宏敏並
爲學官宗侃調上高縣麻塘巡檢三傑擢淮東宣閫掾
由嘗授徒建業臺臣御史稱薦其才天爵亦及識之玄
貞將以某年月日葬君於某鄉某原故三傑狀其行來
請銘嗚呼自周元公居潯陽倡明聖賢之學朱文公守
南康講道於白鹿洞於是環廬阜左右士皆以洙泗濂
洛爲宗而李燔敬子呂燾德昭周謨舜弼蔡念成元思

胡泳伯量相繼而作流風遺俗迄今尚存敝齋先生晚
登朱子之門與敬子德昭諸公相友遺文數十卷藏於
家其昆季子孫接於見聞觀感而化考君之修身制行
若此則家學世德之淵懿其亦有所本歟予故不辭而
爲之銘銘曰

有美楊公悃悃無華聿修其身益大厥家宗族鄉閭推
其孝友一門雍容禮俗孔厚大江之濱匡廬戕戕昔有
君子樂爾絃歌詩書之化無遠不被流風百年家範猶

美爰有貞石刻此銘詩嗟我里人尚克式之

房山賈君墓碣銘

進士賈彛述其先伯父之行來請曰吾家涿之房山世習詩書伯父有政事材而弗克壽伯母守節以終其身今既合葬願得銘文表諸墓天爵自幼往來燕趙間每見搢紳故家才子賢孫奮其所能欲効於世而閨門之中亦皆貞順有禮此國家承平俗化之美非一旦一夕所能致也若賈氏者其可徵哉君諱和字仲禮金進士

仗翼縣丞景山之孫故處士德全之子君資簡重少游鄉校日誦書數百言弱冠明經務求大旨不爲繳繞章句學下至醫卜書數咸通其說初著版籍鷹房總管府時中原甫定江左未下朝廷嘗因畋狩以閱武功鷹師所至威若神明或旁緣爲姦而下不勝其虐矣君間爲其官長言國家肇基百戰始得中土蒐畋閱武本以服未服豈宜病民若是乎鷹師嘉君廉謹命司其府錢穀君出納有方久之別藉採石提舉司當宮城肇建欄檻陞

礎與梁池臺悉資玉石供億浩穰主者莫能支辟君掌
其文書事集而工不擾至元十四年四月君以疾卒年
二十八識者哀之大德元年四月葬房山抱玉鄉栗原
先塋娶田氏無子君卒時田氏年二十餘誓不他適屏
去簪珥遂著女道士服深居不出凡四十年族人時遺
蔬米以飲食之天歷元年二月卒年七十一至元二年
二月君之諸姪始舉田氏之柩合祔君墓仍以一人奉
君祀初處士娶康氏生子四人而君長子也次曰閏曰

璞曰壤閏之子仲良仲恭璞之子伯儉壤之子叔讓季常彛仲良之子懋伯儉之子誠壤終宣德府教授彛以至順元年賜同進士出身官將仕郎太常太祝誠好義有聞奉君祀者季常也按賈氏系出晉康叔虞唐長江主簿島以詩名世居涿州范陽金大定末分范陽爲萬寧縣明昌二年又名奉先國初始改房山島墓今在縣境君其苗裔耶銘曰

猗哉賈君才可大受天嗇其年人又奚咎九原無憾

媿有人操其節義蓄德於身瞻彼西山有石如玉琢此
銘詩永表貞俗

處士賈君墓表

至順元年三月天子策士於庭房山賈彞賜同進士出
身或曰是惟詩禮故家世載隱德者也未幾彞以奉常
太祝丁內艱免喪調官新樂其父卒乃命猶子誠來告
曰彞幼學於家庭始忝科名欲以爲親榮不幸復罹大
故苟無文字表章先德後將無以鏡考是則彞所懼也

謹稽門生任享祚所述狀而爲之書君少聰警過人弱冠聞容城劉公因以理學淑多士偕其兄往從焉公愛其兄弟性靜而樂學命其兄名曰璞字保真君名曰瓌字巢夫蓋所以期待者非淺淺也久之學若有得隱處州間以奉其親旨甘修滷孝養克備親疾躬省藥餌憂形於色親歿哀經斂殯遵古喪制兄亡撫諸姪盡恩義教之讀書皆克樹立君綜理家務一髮不以自私建祠堂以奉神主割美田以供祭祀敷教於家遠近學徒恒

百餘人君懇懇爲陳經義大抵祖述劉公之訓爲多學者寒飢或不能存又從而賑給之繪孔子像旦望帥里人祠之蓋欲一鄉興起爲善之心焉與朋友期風雨寒暑未嘗後至爲文渾厚質實不尚華麗一時翕然推重初用薦者授涿州學正再調宣德府教授皆漠如也翰林承旨郭公貫國子祭酒崔公詠燕南廉訪使趙公晟以君才可教胄子俱嘗薦名於朝不報至元元年乙亥八月二日卒君世涿州房山人曾大考金尚醫某祖考

貞祐三年進士伏翼縣丞景山考處士君德全母康氏
娶焦氏早卒繼趙氏子男叔讓提領金玉府採石山場
季常司石局庫次即彛也今翰林國史院編修官女適
焦仲平張世傑趙大本劉某孫男某君享年七十有四
葬房山抱玉鄉栗原先兆昔者劉公以高節絕學師表
當世海內之士聞而興者豈無其人矧親承其學踵其
高尚若君者歟宜有銘以表諸墓銘曰

幽燕山川鬱奇崛士氣感慨多奮烈偉哉容城古豪傑

作訓其徒勵名節若冠有綬玉有珖百世考德載貞碣
故梧州幕府王長卿墓誌銘

君諱士元字長卿其爲人儀觀魁梧倜儻有大志少好
讀書通玄象及先天之學又善行草表其號曰白欄居
士士亦多從之游君談論風生賓客滿座聽之終日不
厭年二十餘慨然思樹功名於世將爲遠遊以廣其見
聞遂涉關陝西至巴蜀南抵六詔覽觀山河之雄壯其
志愈振而不少衰鎮蠻宣尉都元師奇其才辟署爲掾

君忽不樂棄之去徐州諸部宣撫司聞其名復羅致之不敢以曹屬御之也因喜以爲知己因留居焉叙州僻在遐荒蠻民甫定事多無法君稍爲疏櫛滯務衆口咸譽之由是聲名益盛雲南行臺御史薦君爲之佐遠方征戍軍士歲有衣糧之給朝廷慮或侵漁常命御史察之時永昌軍士當給積年之鹽米若干偶御史缺員命君代行有司不敢爲姦軍士大和洞蠶多難作亂行省平章征之道出永昌其民遮平章言願留君以相府事

平章以其事聞尋授將仕佐郎蒞施路軍民總管經歷
大德元年正月也龍江驛者西天緬國塗所經焉或請
合於騰衝府而山路崎嶇三百餘里馬不能馳絡繹死
於道民甚苦之君請復置驛於其所行省是其說仍檄
土官修治之爲經久計雲南左丞尤以君爲可用擢置
掾曹檄至蒞施而軍民固請留之竟不果行大理金齒
及鎮南諸蠻更相讎殺招諭者數不聽或以君薦遂往
諭之彼皆交歡如初行省上其勞君感瘴癘移疾出六

詔邀遊潼淬諸山久之泛江至鄂謀歸其鄉而湖廣省
臣有知其才者援例調梧州幕府適思播洞民及羊溪
猶梗邊遣人諭之不止衆以君熟邊事遂檄君往至則
陳禍福以動之彼亦無事未幾君至蒼梧卒焉王氏世
爲河南洛陽人君曾伯祖賡仕於金以資善大夫汾州
等處提刑使卒官所遂家於汾曾祖貞司天監保章大
夫祖炳業儒以金政亂不克仕父瓘國初歷林石二州
教授妣任氏有子五人君其長也生於歲之壬子卒於

至元戊申享年五十有六歸葬西河縣慶雲鄉洪哲里
娶劉氏三子某某前君卒璽後君三月生今治進士業
君母弟士毅仕至奉毅大夫湘鄉知州兼勸農事以至
正三年六月卒於江南其子翰林國史院檢閱官稷將
與璽扶柩北歸遣其弟楫來請曰伯考平生抱負奇才
欲以自見竟齎志以沒唯公哀而銘之某昔貳春官考
第國子而稷中選重其家世學行之偉故與之銘銘曰
王君卓犖早負奇遊觀蜀漢窮滇池材名傾動西南夷

荷旃被毳髻作椎操刀相讐殺爲嬉聞君一言洞弗疑
不勞征戰興兵師君罹瘴癘志不衰亦思百代休聲垂
欲知君材訂銘詩

元故奉訓大夫昭功萬戶府知事馬君墓碣銘

馬氏本雍古部族金季有爲鳳翔兵馬判官死節者子
孫因以爲氏君諱祖謙字元德故禮部尚書贈推忠宣
力翊運功臣正議大夫僉樞密院事梁郡忠懿侯諱月
合之曾孫行尚書省左右司郎中贈嘉議大夫吏部尚

書梁郡侯諱世昌之孫朝列大夫同知漳州路總管府
事贈中奉大夫河南江北等處行中書省參知政事梁
郡公諱潤之第六子資政大夫御史中丞贈攄忠宣憲
協正功臣河南江北等處行中書省右丞魏郡文貞公
祖常之弟也君賦質清美異於常兒少入鄉校日記數
百言踰冠從文貞公來京師補國子員是時朝廷方尚
文學太史齊公履謙入爲司業請改學制以積分法試
諸生庶幾士知向學而人材出矣詔從其請久之君試

中選授承事郎同知保德州事州居萬山之中事多苟簡君持身以廉奉法惟謹未幾吏始知畏民亦知勸而同列共稱其才焉或謂君官卑祿薄而能盡心其職他時必當富貴君曰吾聞先儒有言一命之士苟存心於愛物於人必有所濟豈覬異日之富貴乎滿考調監保定東鹿縣君曰庶可行吾志矣於是興學訓農以勵其民民訟至庭一言而決胥吏無故不敢輒入鄉社民深德之部使者按臨至邑民老幼數百爭言其賢使者以

其狀聞尋名爲昭功萬戶府知事民聞其去共請留之
不報復以財物爲贖日君在官無毫髮浸漁我民故以
是爲贖君再三諭而却之至元二年十一月十八日君
以疾卒得年四十有二積階奉訓大夫母楊氏封梁郡
夫人生母李氏贈開封郡君娶童氏封開封縣君無子
一女適某以兄祖烈之子惠子爲後今濠州鍾離尉君
卒之明年四月二十七日葬光州桐鄉阡梁公墓北一
里惠子請文以表其墓維馬氏世著勞烈於國至文貞

公以文學益大其家宗族子弟悉教育之俾克有立積
分貢舉連中其科惜乎君之不壽弗克顯於世也銘曰
維馬有氏肇自先公捐身國難慶流於宗衣冠相承世
濟其美尚書之孫梁公之子佐郡監邑烈烈有聲天胡
爾嗇獨隕其生詩書之澤相爾宗族爰載世官來者其
勗

萬億綺源庫知事郝君墓誌銘

君姓郝氏諱伯魯字希曾其父道寧以詩書教授鄉里

學者常至百人今吏部侍郎郭公戶部主事左君尤著名者也君少傳父學起家樂城縣教諭遷固安州學正爲守令者重之爲諸生者敬之間居京師詩酒自娛卓越豪縱或以奇士目之會朝廷崇儒術黜吏弊詔學官未調者悉補百司吏君以才擢戶部史轉太醫院出官將仕佐郎萬億綺源庫知事年五十三泰定元年十一月某日卒妻李氏無子君操守嚴謹戶部綺源掌天下錢穀簿書出納一毫無所私其卒也郭公經紀其喪合

諸友之賻授其弟某以是月某日歸葬君真定縣常山
里先塋銘曰

時須其材而命不偶又將誰咎

滋溪文稿卷十九

欽定四庫全書

滋溪文稿卷二十

元 蘇天爵 撰

碑誌

皇元贈通議大夫翰林直學士上輕車都尉滎陽

郡侯鄭公神道碑銘

并序

至正六年三月某甲子朝列大夫冀州戶騎都尉滎陽
郡伯鄭公進封通議大夫翰林直學士上輕車都尉滎

陽郡侯其子既焚黃告祀家廟又將勒銘表諸幽阡於以發公潛德彰朝廷之寵光覆被子孫於無數乃屬天爵爲之辭維鄭氏真定冀州棗強人家世以才武著顯我國家初入中原命太師國王招集豪傑戡定未下城邑公世父儀帥其鄉人來歸累官龍虎衛上將軍元州兵馬都元帥公之考甫亦以戰功遷同知冀州節度使事兼管民萬戶昆弟子孫爲統軍元帥萬夫長者十餘人千夫百夫長者又十餘人宣尉使御史郎官守令者

二十餘人門閥之貴推次甲乙近代所未有也公諱澧
爲同知節度之第十七子惟節度使有子十九人公性
高潔雅不樂仕曰俱仕固榮矣祖宗墳墓其誰與守乃
營別墅棗強之永川里務躬行實履絕去世俗華靡之
習課家人治耕桑蕃畜牧伏獵以供祀事衣食既有餘
饒推之以周宗親次及鄉鄰之貧者鄭氏族大且盛或
貧乏鬻其世分田者公贖而還其人不責我償也飢者
分粟以活之男女未室者給資粧以嫁之死不能殮者

櫟之蓋以恤災解紛爲心未嘗懈也每思祖考俱有勞烈於國樹立豐碑紀述成績慮有風雨剝裂之憂構華屋以覆之又築室於先墓之側以待展省之至者焉其居家也恒以孝友睦其昆弟春秋浸高衣冠尊肅動履康寧一話一言皆可爲法歲時子孫來謁車騎之盛朱紫之華列拜庭下公雖以家世崇高爲榮復以富貴滿盈爲懼戒子孫以先世驍勇發身忠義報國汝宜奮勵勿墮先訓邑有孔子廟公兄元帥宣靖公勅所建歲久

傾圯公一新之俾士有所受業事母至孝旨甘克盡其
養事兄能順田園悉推讓之及卒室無餘財惟祭器圖
書而已宗族鄰里之人始而愛久而化既沒而猶思焉
公享年七十有八至順二年八月十有八日卒九月十
有八日葬棗強之南留馬原元配劉氏事舅姑以恭相
夫子無違德享年八十有六後至元三年八月某日卒
合祔公墓累封滎陽郡夫人子男三人曰郤曰郛曰郊
女二人適張氏王氏孫男十人敦復至臨由頤素履撫

謙允升其四人幼郁以世家子宿衛內廷出官從仕郎
開城路總管府判官歷陝西行省管勾鄜州同知武衛
經歷進朝列大夫知同州入提舉備用庫出知慶陽府陝
西行省理問遷奉元路總管積階通議大夫國家之制
凡由宿衛官某方者始終不離其地惟闕輔聽中書注
擬他省則三歲一遣官調之郁官關中既久臺憲屢表
廉能蓋其慈祥愷悌之政皆公孝弟忠信所由化也故
推恩之典上賁於公孫諸皆入成均爲胄子敦復以侍

儀舍人擢山東憲掾今官從仕郎太常太祝嗚呼公躬
行於家而人化於里非有過人之才克若是乎使公登
用於時其官勲必與昆季相埒無疑也公既弗欲顯聞
奈何使之湮晦而無所傳乎是宜有銘以著於世銘曰
維古名族德澤深長才子賢孫奕世蕃昌生長食息不
離典訓在家在邦允著令聞冀有鄭氏聿爲名門昆季
衆多其盛如雲桓桓將軍侃侃御史郎官守令冠蓋盈
里公生其間獨樂靜嘉持身孔嚴悃悃無華夙夜奉親

旨甘畢具顧瞻邱隴雖老猶慕家有餘饒惠我宗親匪
惟宗親施及鄉鄰孝友恂恂是亦爲政尚燾爾後克嗣
其慶我銘公墓匪表其私吁嗟里人過者是思

皇元封奉議大夫鉛山知州驍騎尉涇陽縣子張

府君墓碑

至中甲申余遷官西臺覽河山之高深省風土之敦厚
意其必有豪傑之才高尚之節可以爲世模範而士農
之衆亦必有孝友信義可以興起俗化者焉未幾南臺

御史張侯以先世遺事來請曰敝之祖父以好義聞蓋
上承曾祖之志下燾我後人以化其鄉閭者也今將樹
碑墓道願爲文以表之昔余佐中臺幕府侯方爲掾繼
遷掌故蓋交游良善考其先世遺事曾祖墓碣集學士蕭
公所作祖父埋銘太子贊善同公述也二公皆昭代碩
儒關輔高士顧余敢附其後乎已而赴召入朝侯亦持
節按行四川六詔及予參預江浙省政侯又適長幕府
復以墓碑爲請乃爲之文曰奉元路之北若干里龍橋

鎮者張氏家焉其地本屬耀州之三原縣職方氏以三原邑小不足以域民龍橋市井繁行故遷縣治居焉君諱德明字彥明賦性淳質其爲人廉靖忠厚少學詩書言動悉遵軌度篤於養親未嘗暫離左右或勸之仕則曰富貴非不欲也若舍吾親遠遊甘旨將誰致乎初張氏在金以醫爲業至若考則曰醫人命所繫蓋重事也吾以中人之資豈可易爲之哉當國家戡定之初原野方闢加以雍土肥沃乃帥家人治農務歲連大穰家用

饒裕遂大振施於人久之以孝義名一方蕭徵君所以表其墓也及君代理家政尤輕財好義曰此吾親宿昔之志吾朝夕恒懼不克繼之有張澤者因屢婚嫁假貸於君積負甚夥君憐其貧一不責償取其券焚之邑人李和雲陽李仁皆爲隸於人其家欲得錢縱之爲民間君尚義輒往請焉君哀矜其人以私錢數千緡畀之仍爲經紀其家是其書於同公埋銘者特一二事其他不及書者尚多有之推君之心蓋本乎惻隱濟之以惠利

非期欲人之知亦非覲人之見德也君嘗曰今海宇承
平年穀豐足若鄉校不修則無以興治化師道不崇則
無由識禮義乃倡縣侯買地建夫子廟及學舍門廡而
締構像設之費出於君所施者居十之五遠近觀感爭
遣弟子就學讀書習禮以變其俗君教子孫極嚴必擇
賢師良友與之游處使知古人爲己之學故修身泣政
肅然有法蓋君之治家勤以中節儉而合禮祭祀盡孝
燕享致豐誠以接人敬以持己鄉邦無賢愚悉推爲君

子長者君春秋既高以子貴封奉議大夫鉞山知州驍
騎尉涇陽縣子是日宗族閭里咸來致賀子孫以次奉
觴獻壽遠近觀者以爲榮享年七十有九以至治二年
二月二十七日終於所居正寢配李氏先十二年卒贈
涇陽縣君柔順恭恪克修內事是歲五月十有七日合
縣君之喪葬於縣之常平鄉悌友村先兆君祖諱順考
諱貴祖妣馬氏妣孟氏楊氏白氏君白氏出也子男世
英同知鐵州軍民事世昌敦武校尉脫思麻路新附軍

上千戶佩金符累贈中順大夫兵部侍郎上騎都尉清
河郡伯世傑承務郎同知松潘客疊威茂等處軍民安
撫事佩金虎符終奉議大夫同知河州路總管府事世
榮承務郎僉海北廣東道肅政廉訪司事終繕工司丞
孫男曰信曰儒世英子也信中政院管民提領曰儼曰
儼世昌子也儼由奉政大夫嶺北湖南道肅政廉訪使
副司遷江浙行中書省左右司郎中曰佖曰佖曰侃世
傑子也曰佖世榮子也習進士業貢於鄉信之子履陝

西行臺掾嚴之子晉儼之子恒升曰王諒朱安仁女之
夫也曰段珪李溫李安仁黎思恭楊敏王炳段永貞宋
德新孫女之夫也嗚呼古之君子施而不求其報三原
張氏自孝義君樂分施而恥積藏至奉議君克紹先志
惠及鄉邑子孫昆季列官風紀遂爲搢紳望族然則感
應之理益可徵乎銘曰

闕輔之右風土高厚惟人之生克孝而友有美張氏世
以義聞施與其親惠及鄉鄰釐身於家康寧豈弟施于

孫子益大以侈總戎邊聞執法憲臺輝光日新福祿鼎
來世有鄙夫多藏厚積遺及後人鮮有弗失積而能散
其心孔仁已弗求報天福善人鄉有碩儒埋碑熒熒揭文
豐碑永示來葉

元故兩浙運司浦東場鹽司丞楊君墓誌銘

君諱居義字子宜姓楊氏故中書參知政事居寬從兄
弟也其先由華陰徙汴宋宣和間有諱絢者司易州儀
曹事城陷死之贈朝請大夫其子邦基擢金天眷二年

進士第以文藝擅名官秘書監既老拜通奉大夫永定
軍節度使生奉直大夫郊社署令皓皓生監嵩州酒廩
直庭直至淵是爲君考國初爲百夫長卒官鐵冶提舉
君少負奇氣南游江淮當路者以故家子薦之然所司
者不過米鹽之細巡邏之勞君念母孫夫人年高急於
祿養在官皆舉其職未嘗以爲卑也及佐定海始得治
民而監尹皆缺歲仍大飢民多徙死君撫諭有方又值
倭人作亂火城市殺吏民帥府命君供儲峙事集而民

不擾賊平衆皆推公才大可用而君老矣君素貧事母至孝嘗承省檄當如京師徬徨不忍去母曰汝既委身從仕勿以吾爲念也君不得已北行比還母以天年卒君終身以爲痛焉君貌魁梧美鬚髯清白廉靖蓋家法也晚歲刻意讀史歷考古今治亂得失談說如在目前嘗曰吾少罹多故今勉強問學甯戚所謂老而學者不猶愈於坐致怠惰乎君初娶李氏燕中士族繼室沈氏子男曰昱卒於福建道廉訪使書吏曰旭由中臺察院

掾爲浙西道憲司照磨其曰晟曰曇者他姬出也女四
汴人吳鐸王某莘縣徐某宛平張文魯其婿也孫男某
某君初起家常州酒使歷鎮江圖山巡檢嘉興海鹽尉
會陞海鹽爲州改建德淳安尉慶元路務副官進義副
尉主定海簿遷進義校尉兩浙運司浦東場鹽司丞享
年六十有五延祐元年八月朔日卒權殯丹徒汝山原
楊氏自秘監始家燕嵩州府君占籍東昌莘縣別兆邑
之西廉原旭將卜以至正某年某月某日葬君莘之先塋

銘曰

華陰之楊繇漢涉唐族姓蕃昌宋金百年時屢變遷世載
衣冠君多子孫益大其系惟德之自歸葬於莘土厚俗
敦銘詩不泯

大元贈朝列大夫秘書少監董府君墓碑銘

朝列大夫御史臺都事董之用拜江北淮西道肅政廉
訪副使將行來請曰先君少負奇氣思自奮拔喜讀孫
吳兵法習騎射昔至元中丞相淮安忠武王總兵伐宋

收攬豪傑分任將佐或以先君名薦丞相與語奇之乃
命將兵從行攻城野戰躬冒矢石立功居多所過郡邑
惟務輯綏未嘗妄殺一人賴以生者無慮萬計宋平北
歸優游里社卒不言功於時先祖先伯父皆已卒祖母
年高甘旨滄澹克盡孝養祖母既終築廬墓傍啜粥飲
水哭泣三年猶初喪也聞者嘉其孝卒喪事寡嫂有禮
撫諸姪盡恩義衣服飲食不先己子田廬所入悉以歸
嫂嫂卒諸姪求分財異居凡屋之華好田之肥美者悉

令諸姪取之乃前之用等曰吾地雖磽瘠屋雖敝漏我自安之汝兄弟輯睦有立勿憂家不肥也久之貲用益饒宗族朋友之貧者周之有差於是郡守邑宰咸高其行事多咨焉里閭李氏子或誣殺人獄具先君爲辯其誣李氏子得不死殺人者亦獲此先君行事之用得於家庭見聞不誣者也夫善積於躬不享其報委祉於後而獲顯榮宜表墓石昭示永久予嘗同官其爲之銘按董氏河南洛陽人世有隱德君諱清字伯源昆弟三人

曰深曰溥君於次爲第三曾大父洪業家洛之北邙山
墾田千畝積粟萬鐘遇凶歲輒施粟以賑鄉鄰大父裕
父歷名有才畧省府交辟辭不應深居自樂以終其身
母葛氏娶牛氏子男三人大用之用君用女四人嬉適
張誠婉適王課嬪適辛泰好適楊享孫男某某之用初
擢南行臺掾歷蜀憲幕爲樞密院都事遷中書右司由
工部郎中拜監察御史初贈君承事郎同知陝州事進
奉直大夫禮部郎中飛騎尉洛陽縣男加贈朝列大夫

秘書少監騎都尉隴西郡伯牛氏累贈至隴西郡君君
享年八十有三泰定四年八月二十六日卒牛氏年五
十大德元年九月初三日卒合葬洛陽金谷鄉杜村
原銘曰

積厚者家流澤必廣天道昭昭報施不爽偉歟董君早
歲從戎活人止殺卒不言功有行有年又多孫子寵命
載揚華爾桑梓維洛北邙古墓實多豐功盛烈樂石不
磨我述是詩式表潛德尚配昔人垂示無極

荻縣楊氏先塋碣銘

東昌荻縣楊氏其族有二故中書參知政事居寬今江南湖北道肅政廉訪司知事景皆著姓也天爵昔官六察景爲之佐愛其清慎而端雅今焉參預鄂省景居憲幕蓋有斯文之好焉間來請曰景之上世譜軼於兵曾祖迄今凡六傳矣遭時承平朝野治安居者樂歲時之豐登仕者列官曹之清要又承寵命追榮考妣而塋兆封樹之固願求一言以爲之表庶俾子孫永久而弗忘

也按景之曾祖諱善祐慈祥樂易不與物忤時以長者稱之配某氏祖諱寶初以勇果應募爲兵久之擢揚州管軍彈壓佩銀符英毅多謀身率士卒均其勞苦故部伍嚴整而不敢犯帥府推其才謂有古節士風配趙氏晚歲始生一子乃曰吾家有舊田廬先人之所遺也吾嗣守之不敢失墜今託先人遺體幸有一子苟無以教誨之他日何以能保先人遺業乎幸吾子有成則報國有日矣遂棄官歸以勤苦律其身以孝義行於家豈惟

子孫化之而鄉人亦皆矜式焉其所生子景之考也諱
德早承父母之訓長則身任其家務周旋內外克慎以
和胥次洞達與人交無宿怨值父母喪能致哀毀自奉
淡泊惟務儉約有餘輒賑救其宗族閭里之貧者焉大德
某年某月某日卒享年八十有四贈從仕郎邱縣尹配
段氏至大某年某月卒享年七十有三追封宜人子男
六人長敬趙州提控按牘致仕葦縣尉次清次平俱以
孝義力田稱次文應鄉貢進士舉次政仁虞總管府鴈

房提領次景歷山東淮東憲史貢中臺察院授將仕佐郎江東道廉訪知事進從仕郎轉官湖北孫男十七人敬之子伯元清之子伯亨平之子伯榮伯顯文之子伯英伯傑伯貞伯安伯永政之子伯恭伯敬伯讓伯倫伯宜伯直景之子伯仁曾孫若干人伯元之子二長曰遵古國子伴讀次曰遵禮楊氏塋兆在縣之第五鄉太傅保楊家里天爵既序其事復爲之銘銘曰

惟葦之郊九河所瀉河既南流是爲沃野楊氏來居有

田有廬勤爾耕鋤樂爾詩書詩書業成贊畫風紀寵命
在門賁及桑梓疇昔楊氏顯於關西四世三公孰盛與
夷浮陽清明時有消長表石於阡尚企其往

洛陽劉氏阡表

參議樞密院事王君來請曰洛陽多衣冠世家典型文
獻有足徵者外舅劉氏亦令族也子孫欲述族世遺事
表諸先墓吾嘗與之同官幸爲之文無讓按劉氏有仕
金爲管軍教練使者譜逸於兵諱亡夫人魏氏生子慶

昌皇有中夏爲深州管民總管時兵戈甫定法制寬簡
凡爲郡十餘年而不他遷以故得盡設施無所牽制民
獲受其賜焉歲乙卯三月卒年若干夫人馬氏遼中書
令翼之裔孫其家以清白著故服用質素不喜華麗有
田百畝命家人耕稼以供伏臘中統三年九月卒年七
十九子男曰英曰堅女適中奉大夫陝西行省參知政
事趙彥澤堅字彥實性警敏讀書有立稍長不樂進取
然其志嘗欲濟人急難見鄉鄰貧者疾病不能致藥餌

惕然傷之乃從名醫張仲文學久之傳其業疾者當病
授藥而不責其報賴以生全者衆至元十三年三月卒
年三十七以子貴贈奉訓大夫河南行中書省左右司
郎中飛騎尉閔鄉縣男其配閔鄉縣君謝氏年方盛也
貞靜自守躬爲蠶織以給衣食窮苦益久而無變志事
孀姑備孝養勵諸子以學諸子亦能以藝自奮初縣君
考卒無子爲具棺槨葬之母喪明無所歸迎養於家卒
祔其考之墓鄉閭以孝稱焉延祐元年七月卒年七十

三子男德泉將仕郎濟南等處管民副提舉在官以廉慎聞居家則溫然馴行君子也次德淵御史薦其才擢河南山南憲史言南士浮薄不宜任風紀郡縣水旱宜蠲公田賦入以裕民江陵築隄防有司旁緣爲利可罷其工荆湖宣慰使恃貴馳狗馬蹂田稼可禁其獵廷議善其言多施行之進掾甘肅四川行省累遷奉訓大夫知陝州事次德源掾江陵宣慰司卒女適儒士王懋德泉娶李氏繼賀氏一子曰藹女適王敬方參議君也封

洛陽郡君次適鄭彥舉德淵娶王氏閔鄉縣君二子曰
蕙卒曰蘊官永寧尉女適李季璋次適李彥禎德源娶
張氏繼趙氏二子曰芳曰蔚劉氏初爲順德人葬邢臺
東小張村原蓋以貲雄其鄉金之季年教練使始家於
洛卒葬北邙上金谷之陽子孫以其次爲兆葬焉天爵
居京師三十餘年四方之士仕於朝者蓋及識之洛陽
多儒先名公流風遺俗猶有存者郡人漸被其化才賢
輩出若參議君則尤知名於時者也故因請表劉氏先

墓推本其鄉郡之懿而爲之銘銘曰

維洛自昔多巨族衣冠接武振遺俗隆隆劉宗世業篤
教練有子司郡牧郎中活人慎擇術積行累善榮以祿
諸孫孝廉間則肅葬有吉壤邱山麓表石著銘來世告
元故承務郎真定等路諸色人匠府總管關君墓

碑銘

君諱德聚字敬夫姓關氏世爲真定新樂人戶版隸高
唐王府王進封趙戶仍隸之君貌魁梧性惆儻負其才

能欲顯於時數侍趙王往來漢北王念其勞命同知真
定等路諸色人匠總管府事凡王之貢賦出納戶數登
耗皆司之君勤於職守居數月以父喪去官奉母甚篤
甘旨無所缺鄉鄰共稱其孝久之趙王復薦君於朝中
書以聞天子乃降璽書陞爲其府總管階官承務郎君
益修職弗懈歲餘以養母辭歸晨昏定省得母之歡心
享年四十以至正二年九月二日卒關氏世葬新樂長
壽鄉西明村之原不知幾昭穆矣由君之祖別卜塋兆

於先墓西南一里君從葬焉曾祖通妣武氏祖珍妣李氏父政妣孟氏田氏三世積善於鄉有田數千畝歲收萬鍾儉於自奉裕於濟人比歲螟蝗水旱五穀不登民有飢色朝廷聞而憐之輒出楮幣遣使者分行賑救民猶不足又命有司勸大家富民出所有以佐之而闕氏施粟者數矣環君所居百里之內民乏食者相帥有所假貸君不務取厚利惟以活人爲心故人人咸懷其惠聞君之亡多傷悼焉君娶賈氏繼張氏劉氏張氏子男

曰博亦以趙王命同知其府事卓然有立女長適王某
次許適劉某李某初新樂闕氏宗族甚盛其後散居真
定靈壽行唐曲陽之境有諱山者幼爲金人所俘襲爲
謀克謀克者世掌軍旅之官有諱碧者國初以百夫長
戍潁州其孫曰玉終橐城尹曾孫思義從太保劉公起
朝儀擢侍儀引進使累僉江東建康道肅政廉訪司事
曲陽之族也獨君父祖世守墳墓不去至君始以才能
入官既葬之八年博偕君之表弟河東憲掾范思誠求

銘墓碑予以鄉黨之故爲之銘曰

自昔居官多惠愛奚間中朝與流外偉歟關君志慷慨
屢發蓋藏佐賑貸歲值凶荒人有賴豈弟君子神所賚
慶澤淵淵當未艾石著銘章示方來

易州李氏角山阡表

承德郎僉河北河南道肅政廉訪司事李英當泰定丁
卯春二月某甲子葬其先世十餘喪於易州易縣碧玉
鄉角山之陽又十有五年爲至正辛巳英來請曰維李

氏陳州商水人歲壬辰天兵克汴詔徙河南之民實河
北郡縣先曾祖挈其家僑易州歲乙未始占驛傳戶版
時國家設都河林中外之事由驛傳以達而號令傳布
遽於星火曾祖遂遷於涿以趨事焉既終橐殯於涿之
野吾祖以材幹充驛官卒亦殯於涿而曾祖妣祖妣伯
父叔母諸弟之喪或在易州或在固安弗克族葬英時
雖少念之輒痛心疾首少長試吏憲府求升斗祿以養
親及調河東先考妣相繼卒憲長憐其貧爲賻鈔若干

緡始克載其喪歸買地爲兆定昭穆之次自曾祖以下
爲之具衣衾棺槨而葬周以垣墉樹之松柏庶幾祖考
體魄安於斯歟英承先世遺澤忝列風紀考之令甲得
立石表於其阡執事幸賜之銘俾子孫知李氏遷徙之
所由兆域之所始也天爵向官西曹英掾丞相府見其
進退雍容器識深遠其行周其操廉及拜御史又見其
言事切直不避權貴心愛重之故因其請而不辭按英
之曾祖諱誠幼長兵間艱苦百至卒年若干配楊氏執

夫之喪哭泣喪明卒年八十二次馮氏性嚴謹事楊氏如姑卒年七十生二子長仲義次仲信義即英之祖也字敬之讀書有政事材而不克顯其爲驛官御衆有法涿當西南孔道使者絡繹供帳輿馬調發倉卒皆具卒時年未四十人咸惜之先娶涿郡王氏既生子榮則卒繼室固安范氏年三十而寡家貧姑老紡績織紉以供衣食歲時祀享其嚴撫育三子榮德祿輝恩愛均一人或不知爲異母也卒年五十七德祿字受甫爲人忠厚

慈祥事母甚孝母疾湯藥嘗而後進起居扶持夙夜無少懈也居家治生一錢不以自私待昆弟尤篤兄嘗醉怒云云跪而聽之弗離也弟或酤酒亦不與校愈加敬愛久之昆季雍睦里閭舉以爲法焉嘗訓英曰我幼喪親失學汝當劬書自勵於是貸錢買書以遺其子子亦卓然有立其後就養河東卒年六十遺命勿作佛事初贈承直郎禮部員外郎再贈奉議大夫太常禮儀院判官驍騎尉追封易縣子配陳氏卒年五十八追封易縣君

子男英也榮無子輝一子閏早卒仲信娶王氏三子德秀德裕德孚德裕之子質也英由丞相掾爲戶部主事調宣政院都事改南行臺御史未行就遷經歷擢戶部員外郎遂拜御史初英遭親喪獨護靈車北還歷太行之險涉滹沱淵冰之危而皆無虞卒能改卜宅兆以終大事君子賢之銘曰

維昔先王保民多方生有所養死有所藏曰墓大夫職其禁令邱封地域咸位於正古制既微或薄其親棄捐

中野心焉弗忘孝哉李氏葬克以禮角山之阡有穹無
圯

元贈中順大夫中山知府郭府君墓表

君諱聚姓郭氏世爲汴之陽武人早喪父不克推本其
世母陳氏年方少艾誓守節義雖父母不能奪其志居
貧自力於衣食君既成人河南兵亂已不能家乃負母
逃難嘗遇兵士憐其志而遣之轉客河北因占籍於中
山無極龍泉里時中州新去兵難君治生養其母甘旨

無闕供里人共推其孝唐山縣尹程公以女妻君裝送
資賄甚盛程氏賣之買田宅君曰治田疇程氏勤於蠶
績風雨寒暑無少懈也久之遂以貲雄里中君喜施與
歲飢鄰里或乏食不能自存輒出粟以周之或婚喪有
所假貸亦與之其人或不能償見君有愧色君以好言
撫之歲久悉焚其券鄉人皆曰郭氏其有陰德矣初君
命諸子習技藝既而悔曰是豈所以立身揚名者歟乃
延鄉先生於家塾教誨諸子以及鄉人願學者季子明

德給事樞府將從軍征日本道過其家里人危之來語
君曰是役必乘舟浮海前歲軍士能生還者幾人君盍
止之君名明德曰爲人親者皆欲子之侍膝下顧汝有
諸兄以事我汝能委身報國是吾志也君母陳氏卒年
九十有七君自陽武遷其父柩合葬龍泉之新塋君於
至元三十一年年八十四而卒遂從葬焉以程氏祔鄉
人赴者千餘人皆有戚容程氏先君六年年六十九而
卒三子曰成曰潤曰明德潤安肅州稅務使明德少中

大夫同僉樞密院事二女適黎某張某孫男七人弘毅
弘剛擇善擇仁擇義元珪元璋女五人適某某曾孫男
女十五人元珪累官亞中大夫廣平路總管推恩贈君
中順大夫中山知府上輕車都尉追封太原郡伯程氏
贈太原郡君將伐石表君之墓乃以文來請嗚呼古者
之民鄉田同井出入相友守望相助疾病相扶持其親
睦之情爲何如哉後世井田之法既廢不幸民罹水旱
之災而常平之粟猶或足以爲養國初海內治平法制

未備其鰥寡孤獨凶荒飢饉之人獨賴一時好義之家
發其蓋藏以惠活之若郭君者宜其子孫盛大光顯之
若此也然自君之沒五十餘年無極之長老有識君者
與其里人嘗賴君以爲生者往往念之不能忘也歲月
既久壯者曰老老者漸亡幼者或不能知其詳故爲之
表以告其後人焉

滋溪文稿卷二十